

籌遼碩畫

卷之四

四

籌遼碩畫卷之三十八

庚申仲春

天都程開祐仲秩父輯

○山東巡撫王在晉題爲東方田土拋荒無牛耕種海陸原宜分任舟車難以併支懇祈

天恩俯憐疲省特免召買牛隻以救生靈事准戶部咨爲亟處車牛等費以便製辦轉運糧草事內係山東除濟青協濟登萊海運外其昌兗二府每府各派牛六千隻應派買牛一萬二千隻俱動府庫州縣見在銀兩作速買完

其牛轉解至山海關聽遼東差官接運東昌
一府限二月裡到關兗州一府限三月裡到
關其應用銀兩事急不便查發俱動在庫一
應起存錢糧先行買送事完銷筭議補稍有
違限令各經管道府不時揭報本部會同督
撫餉部院戶科從重查叅等因前來該職查
得東省司庫與他省不同凡一切起運錢糧
各屬自爲歛解毫不入司而司庫之所經收
者稱本省兵餉及關包二稅等小數耳今稅

銀爲太監所催轉解戶部爲遼餉之用庫存
有限兵餉先因徵兵四次那借殆盡今本地
新招兵九千又將搜括于司庫此中非不涸
之源尚安有長物以應突然買牛之需乎竊
意非獨無銀尤虞無牛彼東充今歲大旱野
無青草家無餘糧其牛非餓死則轉賣他邦
矣是以秋後得雨欲稱潤佈變而苦于無牛
不能竟畝成耕已絕來年之望則此時萬有
餘牛買何容易况東省既在海運其數有加

無已則陸運之牛似可稍從寬假且二東逼
近奴酋防海宜嚴尚欲借兵于浙乞餉于帑
汲汲然自顧未暇遑恤其他耶惟是買牛之
議在部院已有成說非卑職所敢專也等因
呈詳到職該職會同巡按陳王庭看得遼左
與東省猶指之有臂而衣之有裏也論疆隅
則彼此並重論安危則彼此並急無尤泥之
可封有一葦之可渡今之緩視齊者猶之抱
火厝之積薪之下而寢其上火未及燃故謂

之安而不知火之將及也自遼受侵而齊之
迫如救焚紛如治絲有一不與遼同患者乎
無兵而以爲有兵兵之赴調者數無餉而以
爲有餉餉之轉運者繁無財而以爲有財財
之搜括者盡且請兵而留無餉之兵加賦而
科無田之賦齊集事之難若此籌國者亦宜
憐而少寬矣柰之何復有一萬二千牛隻之
加派于東兗也夫東省從四十三年大饑人
類相殘天親不保米粟盡而烹頭畜頭畜盡

而剝草根樹皮草木盡而啖及人人相食而
父子夫婦忍供嚼噉饑民圖猶在

御前豈民間尚有牛隻乃舍牛而食人之肉耶四
十四年又荒職查兩院會行亟撥耕牛召佃
而牛種已盡乃動官銀他處買牛給散而領
犢甚稀兩年來牧養幾何孽息幾何田畝之
拋荒者未盡闢人民之逃散者未得歸東省
之多荒田匪獨民稀之故亦以有田無牛之
可耕也今歲之荒東充幾成赤土牛無草料

半歸饑死民間正苦無牛朝廷忽有括牛之
令此處之牛旣稀地方之牛必貴不得之本
方而欲買之他方且他方亦買牛起運安能
買別省之有餘給東省之不足庄家卽稍蓄
牛隻一聞括牛恐官法之苛求必將盡化爲
烏有無牛而東省之田益荒矣田荒而國饑
遼餉并海運轉輸之餉益付之不可問矣青
濟登萊四府疲于海運萬姓憂生東昌兗州
卽無海運而今歲河水淺澁職官露宿河濡

丁夫胼胝疏瀹拮据五旬未遑勞止數千糧
艘得灌輸于京皆竭兗東二府之民力目前
田賦無償人民逃竄粒米如珠野多餓莩窮
民挈其子女轉鬻圖存安得令其賣子買犢
以應公家之急耶且物力有限馬代步必不
可責之代耕鷄司晨必不可責之司昏今東
省旣責之供海又責之供陸是有司昏之鷄
代耕之馬也恐并代步司晨而俱廢矣夫牛
隻之全備未必仗以存遼而先以山東爲殉

東省之民何不幸而生斯世降割若斯甚也
據稱應用銀兩事急不便查發俱動庫貯起
存銀兩查庫貯錢糧見徵者已解未徵者尚
視田間之寸草今冬得雨甚遲麥多未種其
能括地皮以供牛價否無論無價卽有價而
萬二千之牛何處覓買何法處辦限以二月
三月取之如寄道臣索牛經臣卽如數與之
經世索牛餉臣卽如數派之職等卽如數以
督責司道司道卽如數以責成府州縣而空

拳搏虎終屬虛聲塵飯救饑何裨實用迨至
呼牛無牛無論住俸查叅卽褫斥職等亦何
救於緩急安危之數哉故職等寧冒控以受
抗令之罪決不敢輕諾以貽誤國之禍伏念
六合之內孰非王土勞逸當均今近地累受
艱煩貧土不堪紛擾連年荒旱如齊徵調轉
輸如齊切近遼左安危相倚如齊當存一綫
生脉以救萬姓顛危有援山東之例請寬請
減者只問彼處曾有人相食之饑荒否曾有

歲不停之海運否其口自塞萬無水陸輸轉
舟車汎駕併煩一省之理朝廷以公道勞民
勞而不怨當事者聽言思理必不以職等爲
推諉矣咄咄東方溝瘠相望卽海運添至二
十萬俄而改議三十萬分外又議添召買三
十萬當粒米狼戾不能取盈至糞田不足反
至加倍強之不顧其安言之不必其竟當事
者亦惟計窮勢迫職等非不體諒慨欲驅予
遺以殉而殉無可殉則職等之計窮勢迫又

不得不望于當事之體諒也除俟司道詳至
另容補瀆外其車牛一節伏乞

勅下戶工二部酌議借辦特賜寬免卽萬不獲已
或止令充東二府共辦三分之一以少緩予
遺湏臾之死亦以完遼左湏臾之唇齒也

○廣西道監察御史王遠宜題爲遼左需兵甚急
廟堂籌策宜周伏乞

聖明特厯東顧以拯危疆以保

宗社事職閱邸報見經臣爲運完軍器恭謝天恩

一疏內言遼自三路敗衄軍火器仗拋棄無遺伏蒙

皇上特允所請發各樣神器盔甲轉運到遼三軍赤體空拳一旦得此壯軍容而敢敵愾又朝鮮告急求撥兵防援卽徼得

旨着該部作速議覆仰見我

皇上留心于遼東未嘗時刻少忽竊幸遼事尚可爲不覺舉手加額爲

宗社慶第奴酋擁兵數萬紀律賞罰久稱嚴明其

器甲堅利尤十倍于我屢入屢勝志氣益驕
向來隆冬嚴寒不便行兵故暫爾驚伏今冬
寒已過吞噬將逞李永芳居中調度欲于春
月傾巢而來決一死戰且東夷西虜合謀蒙
古墩憨指天爲誓俱欲同時入犯遼鎮孤城
眞同纍卵今朝鮮又報賊兵屯于牛毛寨萬
遮嶺造作長梯謀犯緊急請兵防援以資犄
角此其勢尤急且追賊無所不謀我必無所
不備關緊要害之地在在設防處處守禦使

賊莫能窺我堅瑕方可銷狡酋不軌之心而
寢其肆志廼觀監軍新兵失伍之疏閱臣兵
氣不振之疏暨經臣催兵愈變之疏新招遼
兵所藉以振揚威武衛護疆圉者皆不待兩
軍對壘棄伍先逃以遼守遼之計不足爲恃
一至于此而各將統領部下軍丁率又多陸
續烏合之衆及招回逃陣殘卒此亦何足憑
依而用以摧敵陷陣可當奴酋之鋒遼之爲
遼岌岌乎其殆矣宜乎眺望援兵出關而眼